


La vita in clostra in temps da pandemia



Causa la pandemia dal virus corona es la clostra Son Jon a Müstair pel mumaint serrada per giasts ed eir pella populaziun.

fotografia: mad



Da las nouv sours illa clostra Son Jon a Müstair han be duos damain da 60 ons. Perquai toccan las bleras d'ellas pro la gruppa da personas specialmaing periclitadas dal virus corona.

«Nus eschan in nouv sours qua in clostra, lura es il spiritual Gregor in chasa ed eir l'administradur», declera la priura Aloisia Steiner da Tuer chi'd es gnüda eletta l'on passà d'utuon sco successura da la priura Domenica Dethomas da Müstair. Pervi da la pandemia dal virus corona s'ha la vita in clostra müdada in plüs regards.

«Sortin be schi sto propcha esser»

Ch'ellas nun hajan actualmang ingüns giasts, declera la priura, cha la chasa pels giasts saja serrada. Quai vala eir pel museum da la clostra. «Nus nu vain ingünas visitas e la clostra bandunaina be schi sto propcha esser, per exaimpel per ir pro'l meidi.» Ma uschiö as cunte-

gnan las sours plainamaing sco prescrit dal Chantun: «Tanter da nus vaina adüna la distanza da duos fin trais meters, quai vala eir pro l'urazchun e pro la messa», disch priura Aloisia, «nus nu dain neir na il man a ningün e scha nus vain da tuossir faina quai illa foppa dal chandun.»

«Dain bada amo plü ferm»

Sco ch'ella cuntinuescha dan las sours in quist temp da la pandemia amo plü ferm bada a las otras: «Nus guardain propcha consciantamaing vicendavelmaing in fatscha per verer co chi va a las sours ed eir als oters.» Ch'uschea possna avoir pisser üna da tschella «e pudain eir reagir sveltschi vess dad esser necessari». Las abitantas da la clostra Son Jon sun, sco cha la priura disch, eir fich gratas chi pon celebrar mincha di la soncha messa. Quai es pussibel perquai cha'l spiritual Gregor abita eir in clostra e nu sto uschea gnir da l'extern in quella. «Actualmaing nu pudaina laschar tour part a la messa ad ingün da la populaziun, e quai es greiv», constata la priura Aloisia, «ma

pella sgürezza da tuots stuvaina ans tgnair vi da quist scumond.»

S'infuormar in differentas manieras

La priura e las ot sours illa clostra da Müstair legian eir tuot las infuormaziuns e prescripziuns da la Regenza, da l'Uffizi episcopal ed eir dal cumün da Val Müstair: «Quellas prescripziuns pigliaina tuottas propcha serius e provain da respunder plainamaing», accentuescha la priura Aloisia, «che cha nus fain excepziunalmaing eir causa la pandemia es cha nus guardain duos jadas l'eivna la saira a las set e mez las novitats illa televisiun.» Quai es ün'ulteriura pussibilità pellas sours per s'infuormar. Cha'ls purtrets fetschan grond'impreschiun, disch la priura, «schi's vezza co cha'ls ospidals e l'economia sun suot squitsch e cha la dischoccupaziun crescha pervi dal virus corona. Nus urain per tuots süen tuot il muond cha quist virus possa bainbod gnir cumbattü e chi's possa bainbod darcheu tuornar a la vita normala.» (fmr/fa)

Pasqua ingon be daperellas

Chi saja grazcha al Segner, malgrà la pandemia dal coronavirus, eir quist on Pasqua, disch la priura Aloisia Steiner da la clostra Son Jon a Müstair, be chi sarà üna Pasqua ota co normalmaing. «Nus sours pudain bainschi celebrar la festa da Paqua sco üsità, nus savain però ch'oters nun han quella

pussibilità, e quai ans fa mal.» Cha'ls concrettaivels dadour la clostra in cumün e regiun possan as participar a la festa be i'l spiert, declera la priura, «perquai includarana in noss'urazchun a tuot ils umans chi nun han la pussibilità da tour part a la festa da Pasqua da quist on.» (fmr/fa)